

Wo wuwiću jara pozitiwnje překwapjeny

Budyšin (SN/JaW). Zapóslanc zwjazkowneho sejma a člon jeho etatowneho wuběrka dr. Reinhard Brandl (CSU) je wčera a džensa Serbow wopytał. Přeprošyła bě jeho rozžohnowaca so zapóslanča zwjazkowneho sejma Marja Michałkowa (CDU). „Pozadk přebytka je, zo by so wón ze serbskimi institucijemi a wšitkim, štož nas wučinja, wosobinsce zeznajomił. Ja wšak hižo njekandiduju a njebudu z nim wjac hromadže džětać. Tuž je wažne, zo wón wě, wo čo dže“, Michałkowa rozloži. Dr. Brandl džě je w etatowym wuběrku zamołwity za pjenjezy zwjazkowneho nutřkowneho ministerstwa a tuž tež za spěchowanje Založby za serbski lud.

• Džensa je politikar Ludowe nakładnistwo Domowiny a redakciju Serbskich Nowin wopytał. Jednaćelka LND Marka Maćijowa zbliži jemu džěławosć a nadawki nakładnistwa. W redakciji SN zajimowaše so zapóslanc wosebje za prezentaciju nowin a časopisow LND w nowych medijach a za zwiski redakcije k druhim dženikam. Hižo wčera poby mjez druhim pola předsydy Domowiny Dawida Statnika, wopyta Serbski rozhiós a měješe składnosć so ze založbowym direktorom Janom Buda-

rjom rozmołwjeć. „Fascinowace bě widžeć, što je w běhu jednoho lěta na polu nowych medijow nastalo, za což wšak smy přidatne srědky přewostajili. Sym so sam w lekciji nastawaceho online-kursa serbsčiny pospytał a sym pozitiwnje překwapjeny“, rjekny SN. Tohorunja wčera

wobdžěli so wón na diskusiji z 20 zajimcami w Pančicach-Kukowje. „Narěčane temy běchu zajimawe a sym za sebje tóžšto paralelow k Bayerskej, zwotkeľ pochadžam, sčahnyć móhl. Bayerojo a Serbja w Sakskej su sej po powaze chětro bliscy“, bilancowaše dr. Brandl.



Šefredaktor Serbskich Nowin Janek Wowčer rozloži dr. Reinhardej Brandlej a Mari Michałkowej aktualne položenje SN.
Foto: SN/Maćij Bulank